

## No. 97. 1444. 21. März.

*Kurf. Friedrich bestätigt den zwischen den Vorstehern geistlicher Stiftungen und der Ritterschaft im Umkreise von einer Meile um Meissen eines und dem Rathe und der Stadtgemeinde andern Theils abgeschlossenen Vertrag wegen des Malzens und Bierbrauens.*

Von gots gnaden wir Friderich des heiligen Romischen richs erczmarschalck, herzog zu Sachsen, lantgraf in Doringen vnd maregraf zu Missen fur vns vnsern lieben bruder herzogen Willhelmen vnd vnser beider erben thun kunt allermeniglich, die diesen brieff sehen horen ader lesen. Als danne langezeit her die wirdigen vesten gestrengen vnd ersamen wiesen vnser lieben andechtigen vnd getruwen epte pröbste prelaten der stiftte rittere knechte vnd erbarmanschaft vnser pflege zu Missen an einem, burgermeister rate vnd ganzee gemeyne vnser stat Missen am andern teil von der kretschmare wegin vmb vnser stat Missen in einer mile wegis vnd neher gelegen in zewitracht vnd vneinikeit gewest, vnd nu miteinander durch sich selbs zcu süne vnd eynikeit komen sind, also haben vns dieselben partien zu bederseit als einen fursten des landes mit fisse demutiglich gebeten, zu sollicher irer hernachgeschriben süne vnd eynikeit der kretschmare vnser verwilligung gunst vnd volwort zuthun, vnd yn die in ewikeit fur sie ire erben vnd nachkomen mit vnserm brieue von vnser furstenlicher gewalt zubestetigen. Des haben wir hirinne erkant vnser vndersassen vnd vndertanen fruntlich eynung, darczu wir danne als billich ist ganz geneigt sind, auch angesehen ire zcimliche redeliche bete vnd darumb zcu sollicher vorgemelter vnd nachgeschribner fruntlicher sune vnd eynikeit vnser gunst willen vnd volwort getan, verwilligen vnd bestetigen yn auch die von vnser furstenlicher gewalt in craft vnd macht dits briefs, also das sie ire erben vnd nachkomen solliche vorgerurte vnd nachgeschriben sune vnd eynikeit als von der kretschmare wegen hinfur zu ewigen zciiten halten vnd dowidder in dheinewise tun sollen, alle geuerde hirinne ganz vzgeschlossen. So sind das die puncte vnd stucke der sune vnd eynikeit als hiuor berurt ist. Zcum ersten, das ein iglicher kretschmar vf vnd vßwendig der myle vor vnser stat Missen wonhaftig melzen vnd bruwen mag alsuil biers, als er des von dem zcapffen mag vorschucken, vnd das in fassen nicht vorkeuffen, aber den couent vnd die treber dauon bekomende mag er vorkeuffen noch sinem besten nuteze vnd fromen. Darnach das ein iglicher kretschmar, der uff vnd in der halben myle ader der inwendig einer myle von vnser stat Miessen gesessen ist, des iares drii bier noch der stat zu Missen ader des landes gewonheit bruwen vnd machen vnd dasselbe bier von dem zcapffen vnd nicht mit fassen vnd darczu den couent vnd die treber von denselben drien biern bekomende noch sinem besten nuteze vorkauffen mag, auch das ein iglicher kretschmar vf der myle, in der halben mile ader bynnen der myle vnser stat Missen wonhaftig keyn malcz anders danne in vnser stad Missen vmb lon sal machen. Er sal auch sollich malcz zu den vorbenanten drien biern, die im zubruwen als hiuorbegriffen ist erleubt sind, selbst in sinem kretszmar machen ader machen lassen ader sich des, ab er das kouffen ader